

## La ARLeF e diplome i prins 23 insegnants in stât di doprâ *Lenghis* inte didatiche in Marilenghe

*A insegnaran intes scuelis primariis e secundariis di prin e secont grât de region.*

A son stâts consegnâts, li de sede istituzionâl de Region F-VJ di Udin, i **diplomis ai 23 insegnants** che a àn partecipât cun profit al **prin Cors organizât de ARLeF** (Agenzie Regjonâl pe Lenghe Furlane) **par imparâ a doprâ e programâ “Lenghis” intal insegnament scolastic de lenghe furlane.**

Di là dal president de Agenzie, **Lorenzo Fabbro**, a jerin presints la vice direttore centrâl de Aree istruzion, alte formazion e ricercje de Region F-VJ, **Ketty Segatti**, la ispetore dal Istitût scolastic regjonâl, **Paola Floreancig** e **Adriano Ceschia** dal Claap, “ideadôr” di “Lenghis” e docent dal Cors. I diplomâts a insegnin e a insegnaran intes scuelis primariis e secundariis di prin e di secont grât de region.

«Cun chest strument inovatîf e interatîf pensât di pueste pe didatiche multidissiplinâr plurilengâl – al scolaris Fabbro -, la Agenzie, la Regjon e l'Ufici scolastic a vuelin dâ un altri contribût ae domande dai docents di podê doprâ struments didatics modernis, di difusion facile, e che si puedin modulâ daûr des competencis sedi dai arlêfs che dai insegnants. Vuê, dopo la formazion che e continuerà, o passarin ae fase di sperimentazion sul cjamp cjapant dentri istitûts comprensîfs a tacâ dal an scolastic che al sta par scomençâ».

«Il Cors al veve doi fins – al zonte Ceschia -: il prin al jere chel di acuisî la competence applicative di “Lenghis”, il secont chel di otignî ancje la competence programatorie des unitâts di aprendiment dal strument. **15 insegnants a àn rivât chest secont nivel e a deventaran la anime de sperimentazion** e, o sperin, de difusion seguitive di “Lenghis” intes scuelis furlanis».

“Lenghis” al è un strument informatic pal insegnament de lenghe furlane intun contest plurilengâl, ideât de cooperative “Centri di linguistiche aplicade Agnul Pitane” (Claap), cu la poie de ARLeF. Al consist intune Biblioteche digjitâl e intun Laboratori di esercitazions linguisticis par une o plui lenghis in rapuart mutuâl. La Biblioteche e pues vê dentri tescj di diviers gjenars e tipologjii; e pues jessi insiorade cence limits e pandude inte rêt a disposizion di ognidun che al dopre il strument e e pues jessi personalizade di un utent singul. Il Laboratori al è un “gjeneradôr” di unitâts di ativitâts o esercitazions variis par ogni test e duncje al è metût dentri intune “lavagne” pes esercitazions stessis. “Lenghis” si utilize intai laboratoris informatics des scuelis o intes aulis cun lavagne luminose o videoproietôr e al pues jessi implementât di cui che lu dopre.

Udine, ai 6 di Setembar dal 2016

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche Tel. + 39 0432 229127 / **e-mail: arlef@caltpr.it**  
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<